

Kunnsch zoobe haim – ganz mied vom Schaffe,
wottscho no e rundi Färnsee gaffe.
Druggsch uff e Gnopf – schaltsch d Kischte yy,
bisch bi däm Sänder voll derbyy!
Hesch s scheenschte Bild – der beschi Doon,
e Myggeli am Miggrofoon.
E Schlugg vom Bier – der Rülps vom Lääbe,
wie s teleWaggis – voll dernääbe!



Duu luegsch wie s Volgg scho gwundrig stoot
und wartet, bis es vieri schloot.
Uff aimol kunnt doo dyyni Frau,
macht dir e Szene und Radau!
„Fiess vom Tisch“ het sii bifoole,
„Schatz schalt um, die widerhoole.“
Duu gryffsch zem Bier – hesch s au kapiert,
statt laif derbyy bisch jetz fruschtriert!



Am Mäntig hesch nit frey bikoo,
zem Gligg git s doo dä Laifstriim no.
Gliggsch mol druff, gheersch eine saage:
„Y kenn das Sujet vo däm Waage.“
„Noch 3 Dääg zrug“ stoot vorne druff,
doch dää vom TV macht e Buff!
Im Rädäbäng – wenn dää duesch poschte,
kasch nocheschloo – es dued halt koschte.



Am Zyschtig isch denn Kinderstund,
im Färnsee lauft s jetz richtig rund.
Doo wird e Binggis eerlig gfroogt,
worum er sich uff d Stroos het gwoogt!
Ins Miggrofoon bloost rau der Wind:
„Gopferglemmi“ schreyt don e Kind!
Dii Mamme – sag, het sii das gmacht,
das Goschdyym scheen in däre Bracht.
Dr Binggis fuchtlet mit der Hand:
„Nai, das isch vom Schwoobeland!“



Am Mittwuch denn – bald isch es gloffe,
an der Jokerbar wird greftig gsoffe.
Dermit der Maage no ka blaaiie,
kocht der -minu Ziibelewaaie.
Derzwische gheersch d Tamara singe,
si sälber waiss, das dued nit glinge.
Im Schloss kasch Du mit iire koche,
zer Vorspyys Luft, zem Hauptgang Gnoche.
„Isch loogisch“ dängge sich die maischte,
die kenne sich kai Braitbild laischte!



Zwai Wuche speeter bisch am zäppe,
im „Was lauff“ gseesch dert aine räppe.
Im Ghaimspiel findsch denn ändlig uuse,
wo die vom FCB dien pfuuse.
Bim unxundTV wird no gmässe,
dass Diggi vyyl mee Fleisch dien ässe!
Am Oobe schnurrt ain gwaltig vyyl,
s isch daas der Heer vo Waggiswyyl.
Wottscho dää nimm gsee im Färnsee z Basel,
im Radio gheersch gnau s gylche Gfaasel.



Mir stelle fescht – s isch e Hit,
dass es so ne Sänder git!
teleWaggis – ächt voll derbyy,
so topmodärn wott männgge syy.
Zwar sin d Ydee scho mol gstoole,
doch s brucht kai Box zem Widerhoole!
Noch zwanzig Joor, es laufft scho rächt,
fiir Amateur isch das nit schlächt!!!

Mir stelle fescht – s isch e Hit,
dass es so ne Sänder git!